

## **Oqaaseqaatit nalinginnaasut**

Immiorfiit mikisuararsuit atorlugit Kalaallit Nunaanni immiaaqqanik immiorsinnaaneq teknikkikkut ineriartornerup ajornarunnaarsimmagu, aammalu taamatut tunisassiornissamut atortup siulliup piffissap sivikitsuararsuup ingerlanerani pilersinneqarsinnaanera naatsorsuutigineqarsinnaammat siunnersuutigineqarpoq, imigassat ethanolimik akullit Kalaallit Nunaanni sananeqarsimasut imigassat ethanolimik akullit Kalaallit Nunaannut eqqussorneqartartut volumenprocentimut literimut akitsuutaattut annertutigisumik akitsuuteqartinneqarnissaat.

Naalackersuisut nioqutissanik eqqussuineq annissuinerlu pillugit Inatsisartut inatsisaanni § 14 aqutigalugu periarfissaqarput, nioqutissat eqqussorneqartut akitsuusigaasernerat assigalugu akitsuutinik aalajangersaanissamut. Pineqartoq qangarsuarli aalajangersagaammat Naalackersuisut isumaqarput, akitsuutip taamaattup Inatsisartut inatsisaatigut ersitsuunissaa pissusissamisoortuussasoq, taamaattumillu Inatsisartunit aalajangersagaassasoq.

Inatsisissatut siunnersuut ima ilusiligaavoq, imigassat allat immiaaqqatulli ethanolimik akullit sananeqassagaluarpata aammattaaq inatsimmi ilaatinneqarnissaat isumannaarneqareerluni.

Inatsisissatut siunnersuut Inuussutissarsiornermut Pisortaqarfimmut tusarniaassutigineqarnikuuvoq, oqaaseqaatigisimasaallu siunnersuutigineqartumut ilanngunneqarsimallutik. Avatangiisinut Pinngortitamullu Pisortaqarfimmut, Peqqinnissamut Pisortaqarfimmut aamma Aningaasaqarnermut Pisortaqarfimmut tusarniaassutigineqarnikuuvoq, siunnersuummullu oqaaseqaateqarsimagatik.

Inatsisissatut siunnersuutip isertitassanut annertuumik sunniuteqarnissaa naatsorsuutigineqanngilaq, immiaaqqammi Kalaallit Nunaannut eqqussorneqartartut annertussusiata, immiaaqqat Kalaallit Nunaanni sananeqartussat annertoqqataanik millinissaa ilimagineqarpoq.

Inatsit allaffissornikkut annikitsuinnarnik, tassalu akuersissutuliornernik nakkutilliinermillu kinguneqassaaq.

## **Aalajangersakkanut ataasiakkaanut oqaaseqaatit**

*§ 1-imut.*

Imigassat ethanolimik akullit Kalaallit Nunaanni sananeqartut, imigassat ethanolimik akullit Kalaallit Nunaanni akitsuuteqarfiusumut eqqunneqartut volumenprocentimut literimut akitsuutaasa annertoqqataannik akitsuuserneqartarnissaat siunnersuutaavoq.

Taamatuttaa q imigassat ethanolimik akullit Kalaallit Nunaanni sananeqartut literimut 2,25 volumenpct.-imik sakkortussusillit akitsuuteqartinneqassanngillat.

*§ 2-mut.*

Siunnersuutigineqarpoq akitsuutinik akiliisussaaneq nioqqutissap atorneqarneratigut atuutilertassasoq, tassa imaappoq nioqqutissat suliffeqarfimmit anninneqarlutik pisisartuinut assartorneqaraangata. Nioqqutissat suliffeqarfimmi imigassanik ethanolimik akulinnik sanasumi tuniniagassaappata atugassaappataluunniit, nioqqutissat naamassillugit tunisassiarineqarnerminni atorneqartutut isigineqassapput.

Aalajangersakkami aammattaaq pineqarput imigassat ethanolimik akullit nammineq atugassatut sananeqartut. Taamaattorli imigassanik aalakoornartortalinnik tuniniaaneq sassaalliisarnerlu pillugit Inatsisartut inatsisaanni nr. 11, 11. november 2000-imeersumi § 16, imm. 1-imi allassimavoq imigassanik aalakoornartortalinnik angerlarsimaffimmi sananissaq inerteqqutaasoq.

*§ 3-mut.*

Suliffeqarfiit imigassanik ethanolimik akulinnik, inuussutissarsiutigalugu ingerlatsinerminni atugassaminnik sananissamik kissaateqartut Akileraartarnermut Pisorta qarfimmi pinngitsoorati k nalunaarsortittussaani saata siunnersuutaavoq, tamannami aamma suliffeqarfiit nioqqutissat akitsuusigassat akitsuutaannik akiliinngikkallarlu tik sanasinnaanissaannut uninngasuuteqarsinnaanissaannullu piomasagaataavoq.

Nalunaarsortinngitsoorneq pillaammik akiliisitaanermik kinguneqarsinnaavoq, soorluttaaq nalunaarsortinngitsoorneq akitsuutinik akiliinngitsoortitaanissamik kinguneqarsinnaanngitsoq.

*§ 4-mut.*

Nakkutilliinermut tunngasut eqqarsaatigalugit siunnersuutigineqarpoq init, uninngasuutinik piginnittuusup nalunaarsortissimasup nioqqutissanik suli akitsuuserinneqanngitsunik sananermut, suliaqarnermut, maqitsinermut uninngatitsinernullu atugaasa Akileraartarnermut Pisorta qarfimmit

akuerineqarnissaat, soorluttaa pisorta qarfiup nakkutilliinera naleqquttumik ingerlanneqarsinnaanngippat akuersissuteqarfigineqarneq nalunaarsortinnerluunniit Akileraartarnermut Pisorta qarfiup atorunnaarsissinnaassagaa.

*§ 5-imut.*

Akitsuusigassat suliffeqarfinit qaammatikkaartumik naatsorsorneqartarnissaat siunnersuutigineqarpoq.

*§ 6-imut.*

Piffissami sumiluunniit akitsuusiiffiusussami akitsuusigassap annertussusiata, annertussutsip suliffeqarfiup iniutaanit akuerisaasunit anninneqartup, millissutaasinnaasunik assigisaanilluunniit ilanngakkap annertussuseqataatut naatsorsorneqartarnissaa siunnersuutigineqarpoq.

Tamanna ima paasineqassaaq suliffeqarfik, nioqqutissat allanut tunniunneqaratik ininit akuerisaasunit tammartut akitsuutaannik akiliissasoq.

Akileraartarnermi Pisorta qarfik nioqqutissat akitsuusigassat annertussusaannik immikkut nalunaarusiornikkut qanoq naatsorsuusiortoqassaneraniq maleruagassanik aalajangersaasinnaassasoq siunnersuutigineqarportaaq.

Naggasiullugu Naalackersuisut nioqqutissat akitsuusigassat annertussusaasa aalajangersarneqarnissaannut atatillugu maleruagassanik aalajangersaasinnaasut siunnersuutigineqassaaq.

*§ 7-imut.*

Siunnersuutigineqarpoq nioqqutissat suliffeqarfimmi ikualattoqarneratigut, erngartoqarneratigut assigisaatigulluunniit imaluunniit suliffeqarfimmut suliffeqarfimmiillu assartuinermi annaaneqartut annertussutsip akitsuusigassap § 6, imm. 1 naapertorlugu naatsorsorneqarnerani ilanngaatigineqarsinnaassasut. Ernngartoqarneraniq oqarnermi pineqarpoq, tankit poortuutilluunniit allat aseroneqarnerisigut nioqqutissat annaaneqarnerat. Nioqqutissat tillinniartoqarneratigut annaaneqartut ilanngaatigineqarsinnaanngillat.

Aammattaaq siunnersuutigineqarpoq nioqqutissat utertinneqartut annertussutsip akitsuusigassap § 6, imm. 1 naapertorlugu naatsorsorneqarnerani ilanngaatigineqarsinnaassasut, utertinneqartut akitsuutitaat ilanngullugu suliffeqarfiup utertissimappagu.

Kiisalu siunnersuutigineqarpoq nioqqutissat sumiiffinnut Kalaallit Nunaata avataaniittunut anninneqartut, annertussutsip akitsuusigassap § 6, imm. 1 naapertorlugu naatsorsorneqarnerani ilanngaatigineqarsinnaanissaat.

Oqaatigineqassaaq suliffeqarfiup nalunaarsorneqarsimasup nioqqutissat inunnt suliffeqarfimmi sulisuusunut akeqanngitsumik atugassanngortissimasani, annertussutsip akitsuusigassap § 6, imm. 1 naapertorlugu naatsorsorneqarnerani ilanngaatisinnaanngimmagit.

Naalackersuisut ilaagaatigisassat pineqartut pillugit uppersaaserneqarnissaannut nakkutilliinermi maleruagassatut atugassanik aalajangersaasinnaasut siunnersuutigineqarportaaq.

*§ 8-mut.*

Suliffeqarfiit qanoq iliorlutik akitsuutinut naatsorsuutinik pisariitsumik isumannaatsumillu ingerlatsinissaannut Akileraartarnermut Pisortaqarfiup naatsorsuusiordermut maleruagassanik sukumiinerusunik aalajangersaasinneqarnissaa siunnersuutigineqarpoq.

Naatsorsuutinut tunngasut il.il. pineqartut ukiup naatsorsuusiorderfiusup qaangiunneraniit ukiuni 5-ini toqqortarineqassapput.

*§§-inut 9-mut 10-mullu.*

Akitsuusigassat nalunaarutigineqarnerat akitsuutillu Akileraartarnermut Pisortaqarfimmut akilerneqarnera kingusinnerpaamik pissapput qaammatip tulliuuttup 15-iani.

Piffissaagallartillugu nalunaaruteqartoqanngippat suliffeqarfiup nalunaarsugaanera, nalunaarutip Akileraartarnermut Pisortaqarfimmit tiguneqarnissaa tikillugu Akileraartarnermut Pisortaqarfimmit atorunnaarsinneqarsinnaavoq, soorluttaa q akitsuusigassat annertussusiat Akileraartarnermut Pisortaqarfiup missingersuinermit angissusilersinnaagaa.

Piffissaagallartillugu akiliisoqanngippat suliffeqarfiup pillaatitut ernianik akiligassinneqarnissaa siunnersuutigineqarpoq. Pillaatitut erniat akiligassanngortut qaammatikkaartumik kingumoortumik immikkut akiligassiissutigineqartassapput.

*§ 11-mut.*

Suliffeqarfik arlaleriarluni piffissaagallartillugu nalunaaruteqartarsimannngippat imaluunniit akitsuummik piffissaagallartillugu akiliisarsimannngippat, suliffeqarfiup nalunaaruteqarnissamut imaluunniit akiliinissamut sivikinnerusumik piffissalernerqarsinnaanissaa siunnersuutigineqarpoq.

Naatsorsuutigineqarpoq suliffeqarfiup nalunaaruteqarnissamut imaluunniit akiliinissamut sivikinnerusumik piffissaliunneqarsimasooq piffissami aalajangersimasumi malissimappagu, allakkatigut qinnuteqartoqarneratigut piffissap

nalunaaruteqarfissap imaluunniit akiliiffissap nalinginnaasup  
atorneqaaqilersinnaanissaa.

*§ 12-imut.*

Suliffeqarfiup akitsuut akiligassanngorsimasoq akilerneqarfissaata kingorna  
kingusinnerpaamik ullut 14-it qaangiunneranni akilersimanggippagu,  
Akileraartarnermut Pisortaqarfiup suliffeqarfiup nalunaarsugaaneranik  
atorunnaarsitsisinnaanissaa siunnersuutigineqarpoq. Suliffeqarfik akiliinissamut § 11  
naapertorlugu sivikinnerusumik piffissalernerqarsimappat, nalunaarsugaaneq  
piffissap akiliiffissap qanngiunneratigut ingerlaannartumik  
atorunnaarsinneqarsinnaavoq.

Suliffeqarfiup nalunaarsugaanini akileereeruni peqqissinnaavaa.

*§ 13-imut.*

Suliffeqarfik akitsuutitut akiliinikipallaarsimasoq kingusinnerusukkut  
paasineqarpat, akiliinikipallaarutaasup pillaatitut ernialiunneqarsinnaasut  
ilanngullugit akileqquneqarnerisa kingorna ullut 14-it qaangiutinnginneranni  
akilerneqartarnissaat siunnersuutigineqarpoq. Akitsuut piffissaagallartillugu  
akilerneqanngippat pillaatitut erniat amerlanerusut akiligassiissutigineqassapput.

Suliffeqarfik nalunaarummik nassiussaqaanngippat imaluunniit akitsuutitut  
akiliutissaq suliffeqarfiup naatsorsuutai tunngavigalugit  
naatsorsorneqarsinnaanngippat, suliffeqarfiup akitsuutitut akiligassaata  
Akileraartarnermut Pisortaqarfimmit missingersorlugu angissusilerneqartarnissaa  
aammattaaq siunnersuutigineqarpoq.

*§§-inut 14-imut 15-imullu.*

Akitsuusigassat iluamik nakkutigineqarsinnaanissaat qulakkeerniarlugu  
siunnersuutigineqarpoq, Akileraartarnermut Pisortaqarfik sumiiffimmi akitsuutitik  
misissuisinnaassasoq, imaluunniit naatsorsuutitut tunngasut il.il.  
tunniunneqarnissaannik nassiunneqarnissaannilluunniit piumasaqarsinnaassasoq.  
Tamanna aamma atuuppoq pappialat inummi pingajuusumiikkaluarpataluunniit,  
taannalu tunniussisussaataanngikkaluarpalluunniit.

Aammattaaq siunnersuutigineqarpoq pisortat oqartussaasut qinnuigineqarnermikkut  
paasissutissat inatsisip atuutsinneqarneranut nakkutigineqarneranullu  
pisariaqartinneqartut Akileraartarnermut Pisortaqarfimmut nalunaarutigisassagaat.

*§ 16-imut.*

Siunnersuutigineqarpoq nakkutilliinermut tunngassutillit inatsisip  
atuutsinneqarnissaanut pisariaqartut Naalakkersuisunit  
aalajangersagaliuunneqarsinnaassasut.

*§ 17-imut.*

Siunnersuutigineqarpoq Akileraartarnermut Pisorta qarfiup inatsit manna  
naapertorlugu aalajangiisinaanissaanut, kiisalu aalajangiinerit  
naammagittaalliuutigineqarsinnaanerit, matumani ilanngullugu aalajangiinerit  
allaffeqarfitsigut oqartussaasunut qaffasinnerusunut  
suliassanngortinneqarsinnaannginnerat, pillugu maleruagassiorsinnaanissaanut  
Naalakkersuisut piginnaatitsisinnaassasut.

*§ 18-imut.*

Siunnersuutigineqarpoq Skatterådi tassaassasoq Akileraartarnermut Pisorta qarfiup  
nioqqutissat akitsuusigassaanerannik aalajangiinerinik, akitsuusigassat  
annertussusiannik aalajangiinerinik kiisalu missingersuinikkut angissusiliinerinik  
allaffeqarfitsigut naammagittaalliortarfik.

Aammattaaq siunnersuutigineqarpoq Skatterådip aalajangiinerata, aalajangiinerup  
taassuma pineqartumut nalunaarutigineqarnerata kingorna sap.ak. 4-t  
qaangiutsinnagit Kalaallit Nunaata Landsret-ianut  
suliassanngortinneqarsinnaanissaa. Suliassiisutiginartussaq tassaavoq Kalaallit  
Nunaanni Naalakkersuisut.

*§§-inut 19-imut 20-mullu.*

Siunnersuutigineqarpoq inatsimmik unioqqutitsineq akiliisitsinermik  
pineqaatissinneqarsinnaassasoq. Aammattaaq siunnersuutigineqarpoq  
unioqqutitsineq pillugu suliaq allaffeqarfitsigoortumik naammassineqarsinnaassasoq,  
pineqartup unioqqutitsinini akiliisitsissutillu annertussusia akuersissutigippagit.

Unioqqutitsineq landskarsimut akitsuummik akiliinngitsoorniarluni piaaraluneerluni  
unioqqutitsinerusimappat, akiliisitsissut amerlanertigut angissusilerneqarsinnaassaaq  
aningsaat akilinngitsoorniarneqartut 2-3-riaataattut annertutigisumik.  
Unioqqutitsineq mianersuaalliorujussuarluni pisimappat, akiliisitsissut  
amerlanertigut aningsaat akilinngitsoorniarneqartut affaattut annertutigisumik  
pissaaq. Aalajangersaaneq pissaaq pineqartup aningsaarsiaanut pigisaanullu  
tunngasut aammalu pisut nalinginnaasut qissimigaareerlugit.

Naak eqqartuussisarnermi inatsit unnerluussutip ilusaanik imarisassaanilluunniit  
aalajangersimasunik maannakkut piumasaqaateqanngikkaluartoq  
nalunaarutiginninnermi unnerluussutip ilusaa imarisaalu pillugit malittarisassat  
naqitanngorlugit pigineqanngitsut sukulluunniit atuuttut malinneqassapput.

*§ 21-mut.*

Inatsisip ulloq 1. januar 2004-miit atortuulernissaa siunnersuutigineqarpoq.